



## **Magnum Bullarium Romanum, Seu Ejusdem Continuatio**

Quæ Supplementi loco sit, tum huicce, tum aliis quæ præcesserunt  
Editionibus, Romanæ, & Lugdunensi ...

Ab Alexandro VII. Ad Clementem X.

**Luxemburgi, MDCCXLII.**

LI. Confirmatio Privilegiorum, Exemptionum, Libertatum, Immunitatum,  
Gratiarum, Indulgentiarum &c. Fratrum Eremitarum Ordinis Sancti Pauli  
primi Eremitæ sub Regula Sancti Augustini. Nec non ...

---

[urn:nbn:de:hbz:466:1-74833](https://nbn-resolving.org/urn:nbn:de:hbz:466:1-74833)

Constitutionibus, & ordinationibus Apostolicis, cæterisque contrariis quibuscumque.

§. 4. Volumus autem, ut præsentium transumptis, manu alicujus Notarii publici subscriptis, & sigillo personæ in Ecclesiastica dignitate constitutæ munitis eadem prorsus fides in iudicio, & extra adhibeatur, quæ ipsis præsentibus adhiberetur si forent exhibitæ, vel ostensæ.

Dat. P. A. 4.  
die 27. Julii.

Datum Romæ apud S. Mariam Majorem sub Annulo Piscatoris, die 27. Julii 1658. Pontificatus Nostri Anno quarto.

LI.

Confirmatio Privilegiorum, Exemptionum, Libertatum, Immunitatum, Gratiarum, Indulgentiarum &c. Fratrum Eremitarum Ordinis Sancti Pauli primi Eremitæ sub Regula Sancti Augustini. Nec non Communicationis Privilegiorum quomodolibet concessorum, cum Patribus Ordinis Carthusiensis.

Edita A. D.  
1658.

### ALEXANDER PAPA VII.

*Ad perpetuam rei memoriam.*

Exordium.

IN supremo militantis Ecclesiæ Solio per ineffabilem Divinæ bonitatis abundantiam, nullo licet meritorum Nostrorum suffragio constituti, Privilegia, Gratiæ, & indulta Religiosorum Virorum, qui spiritus seculi illecebris in humilitatis spiritu, & vitæ regularis observantia, vota sua Altissimo reddere jugiter satagunt Ordinibus piè providèque concessa libenter cum à Nobis petitur Apostolicæ Confirmationis Nostræ patrocinio communimus, & aliàs desuper providemus, prout matura consideratione prævia conspicimus in Domino rationi esse consentaneum.

§. 1. Nuper squidem pro parte Dilectorum filiorum Prioris Generalis, & Fratrum Ordinis Sancti Pauli Primi Eremitæ sub Regula Sancti Augustini nobis expositum fuit, quod dudum ad ejusdem Ordinis favorem emanarunt à felicis recordationis Urbano Papa VIII. Prædecessore Nostro Literæ sub plumbo expeditæ, quibus aliorum nonnullorum Romanorum Pontificum Prædecessorum pariter Nostrorum Litteræ reperiuntur insertæ, tenoris qui sequitur videlicet.

Urb. VIII.

§. 2. Urbanus Episcopus servus servorum Dei, Ad perpetuam rei memoriam. Ad Apostolicæ dignitatis apicem meritis licet imparibus divina dispositione vocati, gratos Domino, & Christianæ Reipublicæ utiles fructus, qui ex Religiosis Sancti Pauli Primi Eremitæ sub regula Sancti Augustini tam ex pia, & Religiosa eorum vivendi norma, quam ex sollicitis ipsorum Religiosorum studiis ac continuis laboribus pro divini nominis gloria, ac crebris Verbi Dei prædicationibus, nec non Sacramentorum Ecclesiasticorum administrationibus provenire noscuntur intra cordis Nostri arcana revolventes, ea quæ pro ejusdem Ordinis conservatione, & felici gubernio, providè statuta fuisse dicuntur, nec non quæcumque privilegia, immunitates, exemptiones, libertates, & indulta præfato Ordini à Romanis Pontificibus Prædecessoribus Nostri quomodolibet concessa perpetuè firma, & illibata persistant, libenter cum à Nobis petitur Apostolici muniminis adjicimus firmitatem, & desuper Apostolici favoris auxilium impartimur, prout conspicimus in Domino salubriter expedire.

§. 3. Dudum squidem per felicis recordationis Joannem Papam XXII. Prædecessorem Nos-

trum accepto quod Fratres Sancti Pauli Primi Eremitæ sub Regula Sancti Augustini in Hungaria, & aliis partibus constituti, per austeritatem piæ vitæ, bonorumque operum actiones, adeò sese reddebant in conspectu Dei, & hominum gratiosos, quod eorum exemplo plurimi ad pietatis opera inducerentur, ipsique Fratres secundum Beati Augustini regulam desiderabant virtutum Domino perpetuum impendere famulatum, dictus Joannes Prædecessor, hujusmodi pium, laudabile, & meritorium propositum, & obsequium eorumdem Fratrum dignè in Domino commendans, & gloriosæ memoriæ Caroli Hungariæ Regis, & dictorum Fratrum supplicationibus annuens, eisdem Fratribus Regulam antedictam per eos, & eorum successores, in locis suis, quæ habeant, & præstante Domino imposterum habituri erant perpetuis futuris temporibus observandam auctoritate Apostolica concessit.

§. 4. Insuperque Fratribus eorumque successoribus prædictis, quod in Capitulo ipsorum quoties expediret celebrando, aliquem de eis idoneum in eorum Priorem Generalem eligere, & electum recipere, idemque Prior sic electus, receptus, & habitus in dictos Fratres, & Successores, Visitationis, & correctionis debitæ officium exercere, ac ipsos ab excommunicationis sententia, si quam eos propter violentam manuum injectionem in se ipsos, vel propter statuta dictæ Regulæ violanda incurrere contingeret juxta formam Ecclesiæ consuetam absolvere valeret. Et denique quod ipsi Fratres, & successores eorum in terris, & vineis quas propriis suis manibus excolebant, & imposterum excolerent Decimas solvere, & ad Synodos Diocesanorum eorum venire minimè tenerentur, neque ad id inviti compelli possint indulsit, prout in Litteris Apostolicis piæ memoriæ Clementis Papæ VII. Prædecessoris Nostri, pro eo, quod originales Literæ ipsius Joannis Prædecessoris amissæ erant desuper concessis, quarum tenor sequitur videlicet.

Clemens PP.

§. 5. Clemens Episcopus servus servorum Dei, Dilectis filiis Priori, & Fratribus Sancti Pauli Primi Eremitæ sub Regula Sancti Augustini in Hungaria, & aliis partibus constitutis, salutem, & Apostolicam benedictionem. Provisionis Nostræ debet provenire subsidio, ut jus suum cuilibet conservetur. Hinc est quod Nos tenorem quarundam Litterarum felicis recordationis Joannis Papæ XXII. prædecessoris Nostri in Registro ipsius Prædecessoris repertarum, pro eo, quod sicut vestra petitio Nobis nuper exhibita continebat, originales Litteræ sunt amissæ, de Registro ipso de verbo ad verbum transcribi, & ad vestræ supplicationis instantiam præsentibus annotari fecimus, quæ talis est.

Joan. XXII.

§. 6. Joannes Episcopus servus servorum Dei: Ad perpetuam rei memoriam. Per sanctæ contemplationis studium, innocentis vitæ meritum, & exercitium laudabilium actionum in fidei fragantia, devotionis existentia, & abundantia charitatis Deus Omnipotens Caput Ecclesiæ Sanctæ suæ colitur, & in cultu sui beatissimi nominis, suaviter, & devotè Sanctorum memoria renovatur, rependiturque. Divina gratia his, qui supernæ majestatis excellentiæ variis, & devotis affectibus obsequuntur, pro quorum laboribus centuplum, & ipsis æternæ vitæ gaudium tribuit pro mercede. Sic igitur in Sponsa Christi Ecclesia militante fideles Domini virtutum aromatibus redolentes à Romano Pontifice Successore Beati Petri, & Jesu Christi Vicario in bonis foveantur operibus, ad illa favorabiliter promoventur, gratiosis tradantur favoribus, & opportuna tutelæ munimine roborantur, ut in pacis pulchritudine quiescentes

liberis, & quietis mentibus pensum exsolvant Altissimo debitæ servitutis, sacramque Religionem suprema plantat Apostolicæ Sedis Autoritas, & plantatam nutrit dulcedine charitatis, pietatis lenimento prosequitur, & eo libentius, & benignius januam ei pandit spiritualium gratiarum, quo fidelius, & sedolius per viam graditur Domini mandatorum, & per longanimitatis, humilitatis, & patientiæ meritum, virtutum tendit ad culmina, & sibi aliisque fidelibus thesaurum impetrat celestium præmiorum.

§. 7. Sane ad Nostrum Apostolatus auditum relatio fide digna perduxit, quod Dilecti Filii Fratres Sancti Pauli Primi Eremitæ in Hungaria, & aliis partibus constituti per austeritatem piæ vitæ, bonorumque operum actiones ad se reddunt in conspectu Dei, & hominum gratiosos, quod eorum exemplo plurimi ad pietatis opera inducantur, quodque ipsi secundum Beati Augustini Regulam desiderant virtutum Domino perpetuum impendere famulatum. Nos igitur hujusmodi pium, laudabile, ac meritorium propositum, & obsequium eorumdem Fratrum, Dei, & Sanctorum Suorum prosequentium laudem, & gloriam in Domino commendantes, & attendentes illa salubria, & efficacia fore ad perennis salutis brabnum impetrandum, & ut eo libentius dicti Fratres divinis beneplacitis se occupent, seque diligentius exercent in operibus sanctitatis, quæ invenisse gaudebunt Nos, & dictam Sedem sibi gratiosos, propitios, & benignos. Charissimi in Christo Filii Nostri Caroli Regis Hungariæ Illustris, quem ad fratres ipsos specialis devotionis affectum habere percipimus, Apostolicam pro Fratribus prædictis in hac parte gratiam humiliter implorantis, & eorumdem Fratrum devotis supplicationibus annuentes, prælibatis Fratribus autoritate Apostolica, Regulam concedimus antedictam, per eos, & successores ipsorum, in locis suis quæ habent, & præstante Domino habebunt in posterum. perpetuis futuris temporibus observandam; memoratis insuper Fratribus, eorumdemque successoribus quod in Capitulo ipsorum quoties expedierit celebrando, aliquem de eis idoneum in eorum Priorem Generalem eligere, & electum recipere valeant, & habeant. Idemque Prior sic electus, receptus, & habitus in dictos Fratres, & successores visitationis, & correctionis debitæ officium valeat exercere, ac ipsos ab excommunicationis sententia, si quam eos propter violentam manuum injectionem in se ipsos, vel propter statuta dictæ Regulæ violanda incurtere contigerit, juxtâ formam Ecclesiæ absolvere consueta, denique prædicti fratres, & successores eorum, de terris, & vineis, quas propriis suis manibus excolunt, & ipsi successores præfati excolunt impostero decimas solvere, & venire ad Synodos Diocesanorum eorum minimè teneantur, neque ad id compelli possint invitatis eisdem Fratribus, & successoribus, & Priore de Sedis ejusdem clementia, & benignitate solita, tenore præsentium indulgemus. Nulli ergò omnino hominum liceat hanc paginam Nostræ concessionis infringere, vel ei ausu temerario contraire. Si quis autem hoc attentare præsumperit indignationem Omnipotentis Dei, & Beatorum Petri, & Pauli Apostolorum ejus se noverit incursum. Datum Avenioni vigesimo sexto Calendas Decembris, Pontificatus Nostri Anno tertio, Incarnationis verò Dominicæ Anno millesimo trecentesimo decimo nono.

§. 8. Cæterum, ut earundem Litterarum tenor præfatus sic incertus, omnimodam rei, seu facti certitudinem habeat, Apostolica autoritate

decernimus, ut illud idem robur, eamque vim, eumque vigorem dictus tenor per omnia habeat quem habent originales Literæ supradictæ, & eadem prorsus eidem tenori fides adhibeatur quancumque, & ubicumque sive in judicio, vel alibi ubi fuerit exhibitus vel ostensus, & eidem stetur firmiter in omnibus sicut eisdem originalibus Literis daretur si forent exhibitæ, vel ostensæ. Per hoc autem nullum jus de novo vobis acquiri volumus, sed antiquum si quod habetur tantummodo conservari. Nulli ergò omnino hominum liceat hanc paginam Nostræ annotationis, constitutionis, & voluntatis infringere, vel ei ausu temerario contraire. Si quis autem hoc attentare præsumperit indignationem Omnipotentis Dei, ac Beatorum Petri, & Pauli Apostolorum ejus se noverit incursum. Datum Avenioni quarto decimo Calendas Augusti Pontificatus Nostri anno primo, Incarnationis verò Dominicæ anno millesimo trecentesimo quadragésimo tertio.

§. 9. Et deinde piæ memoriæ Gregorius Papa XI. etiam Prædecessor Noster precibus Prioris Generalis, & Fratrum tunc existentium hujusmodi tunc inclinatus eorum domus in quibus divino vacabant obsequio, sub B. Petri, & sua protectione suscepit, statuens, ut Ordo Canonicus secundum Deum, & Beati Augustini Regulam in domibus ipsis autoritate Apostolica institutus esse dignoscebatur, perpetuis ibidem temporibus inviolabiliter observari deberet.

§. 10. Præterea quascumque possessiones, & bona quæ præfata domus tunc justè, & Canonicè possidebant, aut in futurum concessione Pontificum, largitione Regum, vel Principum, oblatione fidelium, seu aliis justis modis poterant adipisci Fratribus præfatis, eorumque successoribus firma, & illibata permanerent, una cum Ecclesiis, Decimis, Hortis, Vineis, Olivetis, Pratis, Terris, Memoribus, Vadis, pascuis in bosco, & plano, in aquis, & molendinis, in viis, & senitis, & in omnibus aliis libertatibus, & immunitatibus suis, novalium aut quæ propriis manibus, aut sumptibus colebant de quibus aliquis hæcæctus Decimas non perceperat, sive de animalium suorum nutrimentis, nullus ab ipsis Fratribus Decimas exigere, vel extorquere auderet, seu præsumeret; liceret quoque iisdem Fratribus Clericos, vel Laicos liberos, & resolutos à seculo fugientes ad conversionem accipere, & eos absque contradictione aliqua retinere.

§. 11. Prohibuit insuper, ut nulli Fratrum præfatorum post factam in domibus hujusmodi professionem fas esset, nisi Prioris sui licentia arctioris Religionis obtenta, de iisdem domibus discedere: discedentem verò absque communi Litterarum Apostolicarum cautione nullus auderet retinere. Præterea inhibuit ne ullus Episcopus, vel quælibet alia persona ad Synodos, vel ad alios Conventus forenses ipsos Fratres venire, nec judicio seculari de propria substantia, vel possessionibus eorum subiacere compelleret, nec ad domos præfatas causa Ordines celebrandi, causas tractandi, vel aliquos Conventus publicè convocandi venire præsumeret, nec Regularem dicti Prioris Generalis electionem impediret, aut de instituendo, vel removendo, vel revocando eo, qui pro tempore foret contra Statuta Ordinis se aliquatenus intrormitteret, illud adjiciens, ut scilicet Priors ipsi Episcopo salvo Ordine suo, obedire deberent & contra statuta Ordinis præfati nullam obedientiam facere compellerentur.

§. 12. Pro consecrationibus verò Altarium,

vel

vel Ecclesiarum, Ordinationibus Clericorum, seu pro Oleo Sancto, vel quolibet Ecclesie Sacramento, nullus à dictis Fratribus sub prætextu consuetudinis, vel alio modo quicquam audeat extorquere, sed illis hæc omnia gratis Episcopi Diocesani impenderent, alioquin liceret eis quoscumque mallent Catholicos adire Antistites gratiam, & Communionem Sedis Apostolicæ habentes, qui Apostolica freti autoritate dictis Fratribus, quod postularunt impertirentur. Quod si Sedes Diœcesanorum Episcoporum forte vacarent, interim omnia Sacramenta Ecclesiastica à vicinis Episcopis accipere liberè absque contradictione possint, ita tamen, ut ex hoc impofterum propriis Episcopis nullum præjudicium generaretur. Quia verò interdum propriorum Episcoporum copiam non habebant, si quos Episcopos Romanæ Sedis gratiam, & communionem habentes, & de quibus plenam notitiam haberent per eos transire contingeret, ab eis benedictionem Vaporum, & vestium, & consecrationem Altarium autoritate Apostolicæ Sedis recipere valent.

§. 12. Cùm autem generale interdictionem terræ adesset, liceret eisdem Fratribus, clausis januis, exclusis excommunicatis, & interdictis, non pulsatis campanis dummodo causam non dedissent interdictioni, submissa voce divina officia celebrare. Chistina verò, Oleum Sanctum, Consecrationes Altarium seu Basilicarum, Ordinationes Clericorum, qui ad Ordines forent promovendi à Diœcesanis suscipere Episcopi si Catholici forent, ac gratiam, & Communionem Sacrosanctæ Romanæ Sedis haberent, & ea vellent sine pravitate aliqua exhibere.

§. 13. Prohibuit similiter, ut infra fines suorum locorum, nullus sine consensu Diœcesanorum Episcoporum, & dictorum Fratrum, Capellam, seu Oratorium, de novo construere auderet, salvis Privilegiis Romanorum Pontificum, ad hoc novas, & indebitas exactiones ab Archiepiscopis & Episcopis, Archidiaconis, seu Decanis, aliisque omnibus Ecclesiasticis, secularibusque personis; à dictis Fratribus, omnino fieri vetuit, sepulturam quoque in Ecclesiis ipsorum Fratrum liberam esse decrevit, ut eorum devotioni, & extremæ voluntati, qui se in Ecclesiis eisdem sepeliri desiderassent, nisi forte excommunicati, vel interdicti, aut etiam publici usurarii essent nullus obstitere, salvis tamen juribus illarum Ecclesiarum, à quibus corpora mortuorum assumerentur.

§. 14. Decimas præterea, & possessiones ad jus Ecclesiarum dictorum Fratrum spectantes, quæ à Laicis detinebantur, redimendi, & legitime liberandi de manibus eorum, & ad Ecclesias ad quas pertinebant revocandi, libera esset eisdem Fratribus de Apostolica autoritate facultas: Obveniente verò generali priore prædicto, vel suorum quomodolibet successorum, nullus ibidem qualibet subreptionis astutia, seu violentia proponeretur, nisi quem dicti Fratres communi consensu, vel Fratrum major pars consilii sanioris, secundum Deum, & B. Augustini Regulam providerent eligendum. Paci quoque, & tranquillitati dictorum Fratrum paterna in posterum sollicitudine providere studens, autoritate Apostolica prohibuit, ut inter clausuras locorum dictorum Fratrum nullus rapinam, seu furtum facere, ignem apponere, sanguinem effundere, hominem temere capere, vel interficere, seu violentiam exercere auderet. Præterea omnes libertates, immunitates à Prædecessoribus suis Romanis Pontificibus locis dictorum Fratrum concessas, necnon libertates, & extensiones secularium exactionum à Regibus, & Principibus, vel aliis fidelibus rationabiliter eisdem Fra-

tribus indultas confirmavit. Decernens, quod nulli omnino hominum liceret præfatas domos temere perturbare, earum possessiones auferre vel ablatas retinere, minuere, seu quibuslibet vexationibus fatigare: Sed ea omnia integra conservarentur illis pro quorum gubernatione, & sustentatione concessa erant usibus omnimodis profutura, salva Sedis Apostolicæ autoritate, & Diœcesanorum Episcoporum Canonica iustitia, & in supradictis Decimis moderatione Concilii Generalis, prout in Literis ipsius Gregorii Prædecessoris in hunc, qui sequitur modum.

§. 15. Gregorius Episcopus servus servorum Dei. Dilectis filiis Priori Generali, & Fratribus Sancti Pauli Primi Eremitæ, in Hungaria, & aliis Mundi partibus constitutis, sub Regula S. Augustini, tam præsentibus, quam futuris Regularem vitam professis in perpetuum Religiosam vitam eligentibus Apostolicum convenit adesse præsidium, ne forte cujuslibet temeritatis incursum, aut eos à proposito revocet, aut robur, quod absit S. Religionis infringat. Ea propter dilecti in Domino Filii vestris iustis postulationibus clementer annuimus, & domus vestras in quibus divino vacatis obsequio sub Divi Petri, & Nostra protectione suscipimus, & præsentis scripti Privilegio communimus.

§. 16. In primis siquidem statuentes, ut Ordo Canonicus, qui secundum Deum, & Divi Augustini Regulam in domibus ipsius autoritate Apostolica institutus esse dignoscitur, perpetuis ibidem temporibus inviolabiliter observetur. Præterea quascumque possessiones, quæcumque bona prædictæ domus in præsentiarum, iustè, & Canonicè possident, aut in futurum concessione Pontificum, largitione Regum, vel Principum, oblatione fidelium, seu aliis iustis modis præstante Domino poterunt adipisci, firma vobis, vestrisque successoribus, & illibata permaneant, in quibus hæc propriis duximus exprimenda vocabulis. Loca ipsa in quibus prædictæ Domus sitæ sunt, cum omnibus pertinentiis suis, videlicet, cum Ecclesiis, Decimis, Hortis, Vineis, Olivetis, Partis, Terris, Nemoribus, Vadis, Pascuis in bosco, & plano in aquis, & molendinis, in viis, & semitis in omnibus aliis libertatibus, & immunitatibus, seu novalium vestrorum quæ propriis manibus, aut sumptibus colitis de quibus aliquis hæcenus Decimas non percepit, sive de vestrorum animalium nutrimentiis, nullus à vobis Decimas exigere, vel extorquere præsumat.

§. 17. Liceat quoque vobis Clericos, vel Laicos liberos, & absolutos è seculo fugientes ad conversionem recipere, & eos absque contradictione aliqua retinere. Prohibemus insuper, ut nulli Fratrum vestrorum post factam in domibus vestris professionem fas sit, nisi arctioris Religionis obtenta licentia, de iisdem domibus discedere, discedentem verò absque communi Literarum Nostrarum cautione nullus audeat retinere: insuper etiam autoritate Apostolica inhibemus, ne ullus Episcopus, vel quælibet alia persona ad Synodos, vel ad alios Conventus forentes vos ire, vel iudicio seculari de propria substantia, vel possessionibus vestris subjacere compellat, nec ad domos vestras causa Ordines celebrandi, causas tractandi, vel aliquos Conventus publicos convocandi venire præsumat, nec Regularem Prioris vestri electionem impediatur, aut de instituendo, vel removendo eo, qui pro tempore fuerit, contra statuta Ordinis vestri se aliquatenus intromittat; illud adijcetes, ut scilicet Priores ipsi Episcopo salvo Ordine suo obe-

dire debeant, & contra statuta Ordinis sui nullam obedientiam facere compellantur; pro consecrationibus verò Altarium, vel Ecclesiarum, Ordinationibus Clericorum, pro Oleo Sancto, vel quolibet Ecclesiastico Sacramento, nullus à vobis sub prætextu consuetudinis, vel alio modo quicquam audeat extorquere, sed hæc omnia gratis vobis Episcopi Diocesani impendant; alioquin liceat vobis quoscumque malueritis Catholicos adire Antifites, gratiam, & communionem Apostolicæ Sedis habentes, qui Nostra freti Autoritate, vobis, quod postularis impendant. Quod si Sedes Diocesanorum Episcoporum fortè vacaverint, interim omnia Ecclesiastica Sacramenta à vicinis Episcopis accipere liberè absque contradictione possitis, sic tamen, ut ex hoc imposterum propriis Episcopis nullum præiudicium generetur.

§. 18. Quia verò interdum propriorum Episcoporum copiam non habetis, si quos Episcopos Romanæ Sedis, ut diximus, gratiam, & communionem habentes, & de quibus plenam notitiam habeatis per vos transire contigerit, ab eis benedictiones vasorum, & vestium, & consecrationes Altarium autoritate Apostolicæ Sedis recipere valeatis.

§. 19. Cum autem generale interdictum terræ fuerit, liceat vobis clausis januis, exclusis excommunicatis, & interdictis, non pulsatis campanis, dummodo causam non dederitis interdicto, suppressa voce divina officia celebrare, Chrisma verò, Oleum Sanctum, Consecrationes Altarium, seu Basilicarum, ordinationes Clericorum, qui ad Ordines fuerint promovendi, à Diocesanis Episcopis, siquidem Catholici fuerint, & gratiam, & communionem Sacrosanctæ Romanæ Sedis habuerint, & ea vobis voluerint sine pravitate aliqua exhibere.

§. 20. Prohibemus insuper, ut infra fines locorum vestrorum nullus sine consensu Diocesanorum Episcoporum vestrorum Capellas, seu Oratorium de novo construere audeat, salvis Privilegiis Pontificum Romanorum, ad hoc novas, & indebitas exactiones ab Archiepiscopis, & Episcopis, Archidiaconis, seu Decanis, aliis omnibus Ecclesiasticis secularibusve personis à vobis omninò fieri prohibemus: Sepulturam quoque in Ecclesiis vestris liberam esse decernimus, ut eorum devotioni, & extremæ voluntati, qui se in iisdem Ecclesiis sepeliri deliberarunt, nisi fortè excommunicati, vel interdicti sint, aut etiam publici usurarii, nullus obsistat, salva tamen iustitia aliarum Ecclesiarum, à quibus corpora mortuorum assumuntur.

§. 21. Decimas præterea, & possessiones ad jus Ecclesiarum vestrarum spectantes, quæ à Laicis detinentur redimendi, & legitimè liberandi, de manibus eorum, & ad Ecclesias ad quas pertinet revocandi, libera sit vobis, de Nostra autoritate facultas.

§. 22. Obeunte verò Generale vestro Priore, vel suorum quomodolibet successorum, nullus ibidem qualibet subreptionis astutia, seu violentia proponatur, nisi quem Fratres communi consensu Fratrum, vel major pars Consilii sanioris, secundum Deum, & Beati Augustini Regulam, providerint eligendum. Paci quoque, & tranquillitati vestræ paternam in posterum sollicitudine providere studentes, autoritate Apostolica prohibemus, ut intra clausuras locorum vestrorum nullus rapiam, seu furtum facere, ignem apponere, sanguinem effundere, hominem temerè capere, vel interficere, seu violentiam audeat exercere.

§. 23. Præterea omnes libertates, immunitates à Prædecessoribus Nostris Romanis Pontificibus locis vestris concessas, nec non libertates, & exemptiones secularium exactionum à

Regibus, & Principibus, vel aliis fidelibus rationabiliter vobis indultas, autoritate Apostolica confirmamus, & præsentis scripti Privilegio communimus.

§. 24. Decernimus ergo, ut nulli omninò hominum liceat præfatas domos temerè perturbare, aut earum possessiones auferre, vel ablatas retinere, minuere, seu quibuslibet vexationibus fatigare, sed ea omnia integra conserventur eorum pro quorum gubernatione, ac sustentatione concessa usibus omnimodis profutura, salva Sedis Apostolicæ autoritate, Diocesanorum Episcoporum Canonica iustitia, & in supradictis Decimis, moderatione Concilii Generalis. Si qua igitur in futurum Ecclesiastica secularive persona hanc Nostræ Constitutionis paginam sciens contra temerè venire tentaverit, secundo, tertio, & quarto, nisi reatum suum congrua satisfactione correxerit potestatis honorisque sui careat dignitate, reamque se divino iudicio excommunicationi existere de perpetrata iniquitate dignoscat, & à Sanctissimo Corpore, & Sanguine Dei, & Domini Redemptoris Nostris Jesu Christi aliena fiat, atque in extrema exterminatione districtæ subiaceat ultioni.

§. 25. Cunctis autem eisdem domibus sua jura servantibus sit pax Domini Nostris Jesu Christi, quatenus, & hic fructum bonæ actionis percipiant & apud districtum Judicem præmia æternæ pacis veniant. Amen, Amen, Amen. Datum Avenioni, per manum Petri, Tituli Sanctæ Anastasiæ Presbyteri Cardinalis Sanctæ Romanæ Ecclesiæ Vicæcancellarii, duodecima die mensis Septembris, indictione nona, Anno ab Incarnatione Domini, millesimo trecentesimo septuagesimo primo, Pontificatus verò d. Gregorii XI. Papæ anno primo. Item prædictus Sanctissimus Pater Gregorius XI. propria manu se subscripsit, signum suum apponendo: & omnes Domini Cardinales etiam propriis manibus se subscripserunt, ad majorem efficaciam, & certitudinem concessorum. Item Guido Portuensis, Tituli Sanctæ Rufinæ Episcopus. Item Raymundus Episcopus Prænestinus. Item Frater Guilielmus Episcopus Hostiensis, & Velletriensis. Item Ægidius Tusulanus. Item Joannes Tituli Sanctæ Mariæ Presbyter Cardinalis. Item Guilielmus Tituli S. Stephani in Cælio Monte Presbyter Cardinalis. Item Guilielmus Tituli S. Clementis, Presbyter Cardinalis. Item Stephanus Tituli S. Eusebii, Presbyter Cardinalis. Item Franciscus Tituli Sanctæ Sabinæ Presbyter Cardinalis. Item Petrus Sanctæ Præxedis Presbyter Cardinalis. Item Frater Bernardus Tituli Sanctæ Priscæ Presbyter Cardinalis. Item Robertus Basilicæ Duodecim Apostolorum Presbyter Cardinalis. Item Guilielmus, Tituli S. Vitalis Presbyter Cardinalis. Item Joannes Tit. Sancti Marcelli Presbyter Cardinalis. Item Petrus Tituli S. Laurentii in Damaso Presbyter Cardinalis. Item Joannes Tituli Sancti Joannis in Lucina Presbyter Cardinalis. Item Raynaldus Diaconus Cardinalis. Item Vilielmus S. Agneris Diaconus Cardinalis. Item Jacobus S. Georgii ad velum aureum Diaconus Cardinalis. Item Hugo Sanctæ Mariæ in Porticu Diaconus Cardinalis. Item Petrus... Sanctæ Mariæ in Vialata Diaconus Cardinalis.

§. 26. Et successivè piæ memoriæ Bonifacii Papa VIII. similiter Prædecessor Nostræ, omnia & singula, libertates, immunitates, Privilegia, Indulgentias, & facultates Abbati pro tempore existentis, ac Monachis Ordinis Carthusiensis, eorumque Monasteriis, seu locis ab Apostolica Sede

Bonifacius  
PP. VIII.

quomodolibet concessa, seu indulta, eisdem Fratribus Sancti Pauli, eorumque Monasteriis, & locis, dummodo essent Canonice instituta communicavit. Et quod Prior Generalis, & ceteri Priores, seu loca tenentes Ordinis Fratrum Eremitarum predictos Suos Fratres Novitios, & Conversos absolvere, & cum eis dispensare in casibus, in quibus Abbas, & Priores d. Ordinis Carthusiensis poterant libere, & perpetuo possent indulgere; prout in ipsius Bonifacii Prædecessoris Literis tenoris sequentis, videlicet.

§. 27. Bonifacius Episcopus Servus servorum Dei, Dilectis Filiis Priori Generali, & Fratribus Sancti Pauli Primi Eremitæ sub Regula S. Augustini salutem, & Apostolicam benedictionem. In fine Sedis Apostolicæ, cum Ordo, ac sacra Religio sub qua virtutum Domino, devotum impenditis famulatum consistentes, sic splendent per virtutum incrementa, quod digne merentur, præcipuis attolli favoribus, & spiritualibus gratiis confoveri. Nos quidem Ordinem ipsum libenter prosequimur prærogativa favoris, & augmento suorum processuum paternis affectibus promovemus.

§. 28. Hinc est, quod nos volentes, quod idem Ordo felicioribus exinde augeatur auspiciis, & tanto salubrius possitis reddere Domino vota vestra, quanto prioribus fueritis gratiis, & libertatibus à Sede Apostol. communiti, vestris hac in parte supplicationibus inclinati devotis, omnia, & singula, libertates, immunitates, Privilegia, & indulgentias, & facultates, quæ hic ex certa scientia præsentibus haberi volumus pro sufficienter expressis Dilectis Filiis Patri Abbati, pro tempore existenti, ac Fratribus Monachis Ordinis Carthusiensis eorumque Monasteriis, seu locis ab Apostolica Sede quomodolibet concessa, seu indulta, vobis, & Monasteriis, ac locis vestris, dummodo sint canonice instituta, ut eis uti, & gaudere, & quod Prior Generalis, ac ceteri Priores, seu loca tenentes dicti vestri Ordinis possint suos Fratres Novitios, & Conversos absolvere, & cum eis dispensare in casibus, in quibus Pater Abbas, & Priores dicti Ordinis Carthusiensis possint libere, & perpetuo valeatis vobis auctoritate Apost. de speciali gratia, Constitutionibus, & Ordinationibus Apostolicis, nec non statutis, & consuetudinibus, tam præfactorum, quam omnium aliarum ordinationum, ac aliis contrariis, non obstantibus quibuscumque tenore præsentium indulgemus.

Nulli ergo omnino hominum liceat hanc paginam Nostræ concessionis infringere, vel ei ausu temerario contraire. Si quis autem hoc attentare præsumperit, indignationem Omnipotentis Dei, ac Beatorum Petri, & Pauli Apostolorum ejus se noverit incursum. Datum Romæ apud S. Petrum octavo Kal. Martii, Pontificatus Nostris Anno duodecimo, Incarnationis vero Dominicæ, Anno millesimo trecentesimo nonagesimo.

Ad hoc dictus Gregorius Prædecessor, intuitu, & contemplatione gloriose etiam memorie Ludovici Regis Hungariæ, Monasteria, Prioratus & loca dictorum Fratrum Sancti Pauli, quæ tunc habebant, & iustis modis in posterum obtinerent, cum Ecclesiis, seu Oratoriis eorundem, ac personis in eis degentibus à jurisdictione, ac dominio, ac potestate Diocesanorum, & quorumcunque ordinariorum iudicium eximit, & totaliter liberavit, districtius inhibens Diocesanis, & aliis ordinariis quibuscumque, ne in Monasteria, Prioratus, vel loca hujusmodi, aut Ecclesias, & Oratoria eorundem, vel personas in illis degentes jurisdictionem aliquam exercere præsumerent. Ac decernens Monasteria, Prioratus ac loca, nec non Ecclesias, Oratoria, & personas hujusmodi sibi, & Apostolicæ Sedi immediate subiecta esse, prout infra scriptis ejus-

dem Gregorii Prædecessoris, quorum tenor sequitur.

Gregorius Episcopus Servus servorum Dei, Dilectis Filiis Priori Generali, & Fratribus Sancti Pauli Primi Eremitæ sub Regula Sancti Augustini in Hungaria, & aliis Mundi partibus constitutis, salutem, & Apostolicam benedictionem. Sacræ Vestræ Religionis, sub qua mundanis abjectis illecebris, devotum, ac sedulum impenditis Domino famulatum, promeretur honestas, ut vos, & loca vestra specialibus gratiis, & favoribus prosequentes, illa vobis libenter concedamus per quæ divinis obsequiis, ac studio piæ vitæ quietius, & liberalius vacare possitis.

Hinc est, quod nos consideratione charissimi in Christo Filii Nostris Ludovici Regis Hungariæ Illustris Nobis super hoc humiliter supplicantis, & vestris in hac parte supplicationibus inclinati, Monasteria, Prioratus, ac loca vestra, quæ in præsentiarum habetis, & præstante Domino iustis modis imposterum obtinebitis cum Ecclesiis, seu Oratoriis eorundem, ac personis in eis degentibus præsentibus, & futuris à Jurisdictione, ac Dominio, & potestate Diocesanorum, & quorumcunque ordinariorum iudicium auctoritate Apostolica tenore præsentium eximimus, & totaliter liberamus: Districtius inhibentes Diocesanis, & aliis ordinariis quibuscumque ne in Monasteria, Prioratus, vel loca vestra, aut Ecclesias, & Oratoria eorundem, vel personas in illis degentes præsentibus, vel futuras, jurisdictionem aliquam exercere præsumant; ac decernentes auctoritate præfata, Monasteria, Prioratus, ac loca, nec non Ecclesias, Oratoria, ac personas hujusmodi, nobis, & Apostolicæ Sedi immediate subesse; ac irritum, & inane, si secus super hoc à quocumque quavis auctoritate scienter, vel ignoranter contigerit attentari.

Nulli ergo omnino hominum liceat hanc paginam nostræ exemptionis, liberationis, inhibitionis, & Constitutionis infringere, vel ei ausu temerario contraire: Si quis autem hoc attentare præsumperit, indignationem Omnipotentis Dei, ac Beatorum Petri, & Pauli Apostolorum ejus se noverit incursum. Datum Anapinæ sexto decimo Kal. Octobris Pontificatus Nostris Anno septimo, Incarnationis vero Dominicæ millesimo trecentesimo septuagesimo septimo.

Et denique per felicitis memorie Martinum Papam Quintum Prædecessorem Nostrorum accepto, quod antea dictus Bonifacius Papa Octavus Prædecessor, ipsorum Prioris, & Fratrum precibus annuens, & cupiens, ut præfatus illorum Ordo eo felicioribus proficeret incrementis, quo majoribus gratiis foret ab eadem Sede Apostolica communitus, auctoritate Apostolica, & irrefragabili Constitutione prohibuerat, ne aliqui, vel aliquis cujusvis status, gradus, seu conditionis existeret, vel existerent, aliquam personam Religiosam, vel Fratrem dicti Ordinis professum, vel conversum de dicto Ordine in Fratrem alicujus alterius Ordinis parisi, seu etiam, arctioris recipere, seu alias ad Professionem admittere sine speciali licentia, & Apostolicæ Sedis potestate faciente, plenam, & expressam de verbo ad verbum de prohibitionem hujusmodi mentionem, de cætero sub excommunicationis pœna, quovis modo præsumeret, seu præsumerent prohibitionem præsentem, ac inde secuta, quæcumque eadem Apostolica auctoritate approbavit, & confirmavit, & per alias Litteras, personas dictorum Fratrum, & loca in quibus divino essent mancipari obsequio, cum omnibus bonis, quæ tunc rationabiliter possidebant, aut in futurum iustis modis adipisci poterant, sub Sancti Petri protectione suscepit, atque Decimas, Terras, Possessiones, Domos, Vineas,

Greg. Papa.

Hortos, & alia bona eorundem Fratrum, nec non omnes immunitates, libertates eis à Prædecessoribus suis Romanis Pontificibus concessas; Necnon libertates, & exemptiones secularium exactio- num à Regibus, Principibus, & aliis Christianis rationabiliter ipsis Fratribus, & eorum locis hujusmodi concessas confirmavit, prout in ipsius Martini Prædecessoris, quarum tenor sequitur.

Martinus  
PP. V.

Martinus Episcopus Servus servorum Dei, Ad perpetuam rei memoriam. Sedis Apostolicæ providentia circumspicienda, personas sub regulari observantia vacantes assiduo studio piæ vitæ, benigno favore prosequimur, & quæ pro ipsorum complectendis indemnitate, ac Religionis perseverantia pariter, & augmento provida deliberatione facta fuere, ut illibata persistant solidiorum Apostolici roboris consuevit adjicere firmitatem. Dudum siquidem Bonifacius in sua obedientia, sub qua Dilecti Filii Prior, & Fratres Sancti Pauli Primi Eremitæ sub Regula Sancti Augustini tunc perselebant nonus nominatus ipsorum Prioris, & Fratrum precibus annuens, ac accipiens, ut Ordo præfatus eo felicioribus proficeret incrementis, quo majoribus gratis foret ab eadem Sede communitus, auctoritate Apostolica, & irrefragabili constitutione prohibuit, ne aliquis, vel aliqui cujusvis status, gradus, seu conditionis existeret, vel existerent, aliquam personam Religiosam, vel Fratrem dicti Ordinis Professum, vel conversum de dicto Ordine in Fratrem alicujus alterius Ordinis pariter, seu etiam arctioris recipere, seu alias ad professionem admittere sine speciali licentia Sedis præfate, faciente plenam, ac expressam, ac de verbo ad verbum, de prohibitione hujusmodi mentionem: de cætero sub excommunicationis pœna, quam contrafacientes incurrere voluit, eo ipso quovis modo præsumeret, seu præsumerent, prout in Suis Literis desuper confectis plenius continetur.

Quare pro parte dictorum Prioris, & Fratrum Nobis fuit humiliter supplicatum, ut prohibitionem, ac Literas hujusmodi prioris Sedis Apostolicæ muniminis præsidio fulcire de benignitate Apostolica dignaremur. Nos igitur hujusmodi supplicationibus inclinati, prohibitionem, ac Literas prædictas, ac inde sequuta quæcumque rata habentes, & grata, illa eadem auctoritate approbamus pariter, & confirmamus, ac præsentis scripti patrocinio communimus. Nulli ergo omnino hominum liceat hanc paginam Nostræ approbationis, confirmationis, & communionis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, & Beatorum Petri, & Pauli Apostolorum ejus se noverit incursum. Constantiæ tertio Kal. Jan. Pontificatus Nostri anno primo. Et in aliis ejusdem Martini Prædecessoris scilicet.

Martinus  
PP.

Martinus Episcopus, Servus servorum Dei. Dilectis Filiis Priori Generali, Vicariis, & Prioribus, ac Universis Fratribus S. Pauli Primi Eremitæ sub Regula S. Augustini ubicunque consistentibus, salutem, & Apostolicam Benedictionem. Cum à Nobis petitur quod iustum est, & honestum, tam vigor æquitatis, quam etiam ordo exigit rationis ut id per sollicitudinem Officii Nostri ad debitum perducatur effectum. Ea propter dilecti in Domino Filii, quibus licet habere possessiones, & proprium in communi, ex indulto Sedis Apost. speciali, vestris iustis postulationibus grato concurrentes assensu, personas vestras, & loca in quibus divino estis mancipati obsequio, cum omnibus bonis, quæ in præsentiarum rationabiliter possidetis, aut in futurum iustis modis præstante Domino poteritis adipisci, sub Beati Petri protectione suscipimus, atque Nostra speciali auctoritate, Decimas, Ter-

ras, Possessiones, Domos, Vineas, Hortos, & alia bona vestra, nec non omnes libertates, & immunitates à Prædecessoribus Nostri Romanis Pontificibus sive per Privilegium, vel alias Indulgentias vobis, & locis vestris concessas, nec non libertates, & exemptiones secularium exactio- num à Regibus, Principibus, vel aliis Christianis rationabiliter vobis, & iisdem locis vestris concessas, sicut ea omnia iuste & pacifice possidetis, vobis, & per vos eisdem locis vestris Apostolica auctoritate confirmamus, & præsentis scripti privilegio communimus.

Nulli ergo omnino hominum liceat hanc paginam Nostræ confirmationis, & communionis infringere, vel ei ausu temerario contraire. Si quis autem hoc attentare præsumpserit indignationem Omnipotentis Dei, & Beatorum Petri, & Pauli Apostolorum ejus se noverit incursum. Dat. de Sennis septimo Kal. Julii Pontificatus Nostri anno primo Incarnationis verò Domini Nostri millesimo quadringentesimo decimo septimo, singulis præinsertis Literis plenius continetur.

Quare pro parte Dilecti Filii moderni Prioris Generalis Fratrum S. Pauli hujusmodi Nobis fuit humiliter supplicatum, quatenus Literas præfatas, ac Privilegia, & indulta, facultates, libertates, aliaque præmissa pro firmiori eorum subsistentia Apostolica auctoritate approbare, & confirmare aliaque in præmissis providere de benignitate Apostolica dignaremur.

Nos igitur, qui iustis, & honestis petentium votis libenter annuimus, eaque favoribus prosequimur opportunis, modernos, Priorem præfatum, & Fratres Sancti Pauli hujusmodi, & eorum singulos à quibusvis excommunicationis, suspensionis, & interdicti, aliisque Ecclesiasticis sententiis, censuris, & pœnis à jure, vel ab homine, quavis occasione, vel causa latis, si quibus quomodolibet innodati existunt ad effectum præsentium dumtaxat consequendum, harum serie absolventes, & absolutos fore censentes, hujusmodi supplicationibus inclinati: Ex voto Venerabilium Fratrum Nostorum Sanctæ Romanæ Ecclesiæ Cardinalium, super causis ad Episcopos, & Regulares spectantibus præpositorum, Dilecto Filio Nostro Tiberio Tituli Sanctæ Priscæ Presbytero Cardinale Muto nuncupato referente, singulas Literas prædictas, ac Privilegia, indulta, facultates, libertates, immunitates, exemptiones, prerogativas, præeminencias, Concessionem, Indulgentias, favores, & alias gratias universas Spirituales, & Temporales Priori Generali, & Fratribus Sancti Pauli eorumque Ordini, ac Ecclesiis, Capellis, Oratoriis, Domibus, & aliis locis, bonis, & rebus prætactis, tam per prædictos uti præmittitur, ac alios Romanos Pontifices Prædecessores Nostros, etiam per viam Extensionis, & Communicationis, quam per quoscunque Imperatores, Reges, Duces, & alios Principes, ac personas seculares quorumcumque, & qualitercumque concessas, cum omnibus, & singulis inde legitime secutis, & sequendis, (quatenus Privilegia hujusmodi sint in usu, nec hæcenus revocata, aut sub aliqua revocatione comprehensa, & salva Concilii Tridentini quoad exemptionem à jurisdictione Episcoporum, & Ordinariorum, & circa accessum ad Synodum, Benedictionis vasorum, ac vestium, nec non Altarium consecrationis dispositiones, & circa Novitiorum receptionem, salva pariter dispositione Constitutionum Apostolicarum, & Institutionum Generalium, & præterquam quoad Agricul- turam propriis eorum manibus faciendam) Apostolica auctoritate prædicta, tenore præsentium perpetuo approbamus, & confirmamus, grataque, & rata habemus, ac denuo concedimus, nec non illis perpetuæ, & inviolabilis

Apostolicæ firmitatis robur adjicimus, omnique, & singulos, tam Juris, quam facti, & solemnitatum quarumcumque de jure, usu, vel consuetudine, aut alias quomodolibet, requisitarum, vel necessariarum, & quovis alios quantumvis substantiales defectus, si qui quomodolibet intervernerint, aut intervenisse dici, vel censi possint, in eisdem dicta autoritate Apostolica supplemus.

Decernentes, Literas, Privilegia, Indulta, Facultates, Libertates, Immunitates, Exemptiones, Prærogativas, Præminentias, Concessiones, Indulgentias, Licentias, Favores, & alias Grantias prædictas, perpetuò validas, & efficaces ac valida, & efficacia esse, & fore, suosque plenarios, ac integros effectus fortiri, & obtinere. Nec non Priori Generali, & Fratribus Sancti Pauli, & eorum Ordini, illiusque Ecclesiis, Capellis, Oratoriis, Domibus, & aliis locis rebusque, & bonis prædictis suffragari, illasque, & illa tam per Priorem Generalem, Provinciales, eorumque Vicarios, Definidores, aliosque Superiores, & Officiales nunc, & pro tempore existentes dicti Ordinis Sancti Pauli, quam quocumque alios, ad quos nunc quomodolibet spectat, & spectare poterit in futurum perpetuò firmiter, & inviolabiliter observari, & adimpleri debere, ab illisque resili, & recedi nunquam posse, sique per quoscumque Judices ordinarios, & Delegatos, quavis autoritate fungentes etiam Causarum Palatii Apostolici Auditores, ac dictæ Sanctæ Romanæ Ecclesiæ Cardinales, etiam de Latere Legatos, & Vicelegatos; dictæque Sedis Nuncios judicari, & defini debere, ac irritum, & inane, si secus super his à quoquam quavis autoritate scienter, vel ignoranter contigerit attentari.

Non obstantibus præmissis, ac Regula Nostra de gratiis, & Indulgentiis ad instar non concedendis, aliisque quibusvis, Constitutionibus, & Ordinationibus Apostolicis, dictique Ordinis Sancti Pauli, juramento, confirmatione Apostolica, vel quavis firmitate alia roboratis, statutis, & consuetudinibus, privilegiis quoque, indultis, & Literis Apostolicis illi, illiusque Superioribus, & personis sub quibuscumque tenoribus, & formis, ac cum quibusvis clausulis, & Decretis in contrarium forsan quomodolibet concessis, approbatis, & innovatis. Quibus omnibus, etiam si pro illorum sufficienti derogatione de illis illorumque totis tenoribus specialis, specifica, expressa, & individua, ac de verbo ad verbum, non autem per clausulas generales, nec importantes mentio facienda, aut quævis alia expressio habenda, vel aliqua exquisita forma ad hoc servanda foret, illis aliàs in suo robore permanentibus hac vice dumtaxat harum serie specialiter, & expressè derogamus, cæterisque contrariis quibuscumque.

Volumus autem, quod præsentium transumptis, manu alicujus Notarii publici subscriptis, vel expressis, ac sigillo alicujus Prælati, aut Generalis ejusdem Ordinis Sancti Pauli, vel personæ in dignitate Ecclesiastica constitutæ munitis eadem prorsus fides adhibeatur in judicio, & extra illud, ac in Romana Curia, & extra eam, ac si originales Literæ forent exhibitæ, vel ostensæ. Nulli ergo omnino hominum liceat hanc paginam Nostræ absolutionis confirmationis, approbationis, defectuum supplementationis, Decreti, derogationis, & voluntatis infringere, vel ei ausu temerario contraire. Si quis autem hoc attentare presumpserit indignationem Omnipotentis Dei, ac Beatorum Petri, & Pauli Apostolorum ejus se noverit incursum. Datum Romæ apud Sanctum Petrum, Anno Incarnationis Dominicæ millesimo,

sexcentesimo, vigesimo tertio, Idibus Februarii, Pontificatus Nostri Anno primo.

§. 3. Cum autem, sicut eadem expositio subjungebat, prædictus Ordo Sancti Pauli Primi Eremitæ, seu ejus Prior Generalis, & Fratres in Literis præinsertis, Ordinis S. Augustini, per errorem, denominentur, & nuncupentur, quippe, qui sub Regula quidem ejusdem Sancti Augustini ex concessione Sedis Apostolicæ vivant, non tamen d. Ordinis S. Augustini existant. Cumque firmiora, & illibatora persistant illa, quæ sæpius Apostolici muniminis constabiliuntur præsidio, Nobis propterea prædicti Prior Generalis, & Fratres exponentes humiliter supplicari fecerunt, ut sibi in præmissis opportunè providere de benignitate Apostolica dignemur.

§. 4. Nos igitur eosdem exponentes specialibus favoribus, & gratiis prosequi volentes, & eorum singulares personas à quibusvis excommunicationis, suspensionis, & interdicti, aliisque Ecclesiasticis sententiis, censuris, & penis, à jure, vel ab homine quavis occasione, vel causa latis, si quibus quomodolibet innodata existunt, ad effectum præsentium dumtaxat consequendum, harum serie absolventes, & absolutos fore censentes, hujusmodi supplicationibus inclinati, Ordinem S. Pauli Primi Eremitæ hujusmodi, seu ejus Priorem Generalem, & Fratres in præinsertis Literis, Ordinis S. Augustini, per errorem denominatos, & nuncupatos fuisse, autoritate Apostolica tenore præsentium declaramus, ipsosque Priorem Generalem, & Fratres proinde Ordinis S. Pauli Primi Eremitæ, sub Regula ejusdem S. Augustini, non autem Ordinis S. Augustini, denominari, dici, & nuncupari debere statuimus, & decernimus.

§. 5. Præterea, singulas Urbani, & aliorum Prædecessorum Literas Apostolicas præinsertas, ac Privilegia, Indulta, Facultates, Libertates, Immunitates, Exemptiones, Prærogativas, Præminentias, Indulgentias, Favores, & alias Grantias universas, Spirituales, & temporales, d. Ordini S. Pauli Primi Eremitæ, ejusque Priori Generali, & Fratribus, nec non Ecclesiis, Capellis, Oratoriis, domibus, & aliis locis, bonis, & rebus prædictis, tam per prædictos ut præfertur, & alios Romanos Pontifices, Prædecessores Nostros, etiam per viam Extensionis, & Communicationis, quam per quoscumque Imperatores, Reges, Duces, & alios Principes, ac personas seculares quomodocumque, & qualitercumque respectivè concessas, & concessas, cum omnibus, & singulis indè legitimè secutis, & secuturis (quatenus tamen Privilegia hujusmodi sint in usu, nec hæcenus revocata, aut sub aliqua revocatione comprehensa) & aliàs juxta præinsertas Urbani Prædecessoris Literas, sublato, & correcto dumtaxat errore circa denominationem, & nuncupationem d. Ordinis S. Pauli Primi Eremitæ, seu ejus Prioris Generalis, & Fratrum sicut præmittitur commissio, autoritate, & tenore præsentium perpetuò confirmamus, & approbamus, illisque inviolabilis Apostolicæ firmitatis robur adjicimus, ac omnes, & singulos juris, & facti defectus si qui quomodolibet intervernerint in iisdem supplemus.

§. 6. Decernentes easdem præsentis, ac præinsertas Litteras semper firmas, validas, & efficaces existere, & fore, ac prædicto Ordini S. Pauli Primi Eremitæ, ejusque Priori Generali, & Fratribus, & aliis ad quos quomodolibet spectat, & spectabit in futurum plenissimè suffragari, & ab illis respectivè inviolabiliter observari, sique in præmissis per quoscumque Judices Ordinarios, & Delegatos, & causarum Palatii Apostolici Auditores, & Sanctæ Romanæ Ecclesiæ Cardinales, & de latere Legatos judica-



ri, & definiti debere, ac irritum, & inane si fecus super his à quoquam quavis auctoritate scienter, vel ignoranter contigerit attentari.

§. 7. Non obstantibus quoad ea, quæ præsentibus quomodolibet adferantur præinsertis Literis, nec non omnibus, & singulis, quæ in eisdem Literis concessa sunt, non obstare, cæterisque contrariis quibuscumque.

§. 8. Volumus autem, ut præsentium transumptis, manu alicujus Notarii publici subscriptis & sigillo Prioris Generatis d. Ordinis S. Pauli Primi Eremitæ, vel alicujus personæ in Ecclesiastica dignitate munitis eadem prorsus fides in iudicio & extra illud ubique locorum adhibeatur, quæ ipsis præsentibus adhiberetur si forent exhibitæ, vel ostensæ.

Dat. P. An. 4. die 6. Sept.

Datum Romæ apud S. Mariam Majorem sub Annulo Piscatoris, die 6. Septemb. 1659. Pontificatus Nostri Anno quarto.

LII.

Breve confirmationis contractus unionis, seu consortii Ecclesiæ, ac modi eligendi Officiales inter Universitates Cauponum, seu Hospitum, & Albergatorum Urbis.

*Privilegia Cauponum, Hospitum, & Albergatorum confirmavit Pius IV. Constit. 71. tom. 2. in qua determinat, quando tenentur de furtis factis in eorum hospitibus.*

Edita An. D. 1659.

ALEXANDER PAPA VII.

*Ad futuram rei memoriam.*

Motiva hujus Constit.

**E**X commissa Nobis divinitus dispensationis officio controversias inter Universitatem Stabulariorum, seu Albergatorum ex una, & Universitatem Cauponum, seu Hospitum, nec non Hospitum Albergatorum mixtorum de Urbe ex altera partibus, de, & super prætenso rescissione, sive nullitate contractus unionis, seu consortii Ecclesiæ S. Juliani, & aliis hinc inde deductis prætensionibus, & signanter super electione Guardianorum, & Officialium eorundem Universitatum subortas dirimere cupientes.

§. 1. De Congregationis Venerabilium Fratrum Nostrorum Sanctæ Romanæ Ecclesiæ Cardinalium, & Dilectorum Filiorum Romanæ Curie Prælatorum super negotiis Visitationis Apostolicæ Ecclesiarum, & locorum piorum Urbis prædictæ à Nobis institutæ deputatorum consilio, auditis pluries per Venerabilem Fratrem Marcum Antonium Episcopum Hierapolitanum unum ex Prælati, & executorem decretorum ejusdem Congregationis partibus præfatis, earumque rationibus, & juribus ponderatis, ad conservandam unitatem, concordiam, & pacem inter eandem Universitates, illarumque homines, & ut omnis inter eos dissensionis fomentum de cætero præcidatur, ac illi in unum fraternæ charitate convivant.

§. 2. Instrumentum unionis, & concessionis consortii ante dictæ Ecclesiæ Sancti Juliani, licet nondum Sedis Apostolicæ auctoritate in vim Literarum fel. recor. Papæ VIII. Prædecessoris Nostri in simili forma Brevis expeditarum confirmatum inter partes prædictas servandum esse, auctoritate Apostolica tenore præsentium decernimus.

§. 3. Præterea quod fructus locorum quinque Montis Salis secundæ erectionis, provenientes ex pretio communicationis dictæ Ecclesiæ soluto per Universitatem Hospitum, seu Cauponum spectent, & sint proprii, ac ad liberam dispositionem antedictæ Universitatis Al-

bergatorum, reliqui vero fructus aliorum duorum locorum ejusdem Montis, qui remanent, & continentur in Literis patentibus die 28. Aprilis 1644. & die 16. Novembris 1645. expeditis sint pariter, & spectent ad liberam dispositionem Universitatis Hospitum, seu Cauponum, ita tamen ut fructus prædicti erogari non possint, nisi in usum, & beneficium dictæ Ecclesiæ olim S. Juliani, nunc autem sub invocatione Sanctorum Martini, & Juliani auctoritate, & tenore prædictis statuimus, & ordinamus.

§. 4. Volentes, quod in futurum eligantur sex Guardiani, duo scilicet ex simplicibus Albergatoribus, alii duo ex Hospitibus seu Cauponibus, reliqui verò duo ex Hospitibus Albergatoribus mixtis, & ad effectum prædictum fieri debeant tres pyxides, seu buffulæ, in quibus ponantur, seu imbuſulentur personarum Universitatum hujusmodi nomina, extrahenda solitis temporibus, & idem proportionabiliter servetur in cæteris Officialibus earundem Universitatum.

§. 5. In reliquis verò observentur ipsarum Universitatum statuta, nec non conventiones, & disposita in prædicto Instrumento consortii, quibus nullatenus censeatur derogatum. Cæterum præsentis Literas semper firmas, validas, & efficaces existere, & fore, illique ad quos spectat, & pro tempore spectabit plenissime suffragari, & ab illis respectivè inviolabiliter observari. Sicque in præmissis per quoscumque Judices ordinarios, & delegatos, etiam causarum Palatii Apostolici Auditores judicari, & definiti debere, ac irritum, & inane si fecus super his à quoquam quavis auctoritate scienter, vel ignoranter contigerit attentari pariter decernimus.

§. 6. Non obstantibus præmissis, ac Constitutionibus, & Ordinationibus Apostolicis, nec non quatenus opus sit memoratarum Universitatum, etiam juramento, confirmatione Apostolica, vel quavis firmitate alia roboratis statutis, & consuetudinibus, privilegiis quoque indultis, & Literis Apostolicis in contrarium præmissorum quomodolibet forsan concessis, confirmatis, & innovatis. Quibus omnibus, & singulis illorum tenores præsentibus pro plenè, & sufficienter expressis habentes, illis aliàs in suo robore permanuris, hac vice dumtaxat specialiter, & expressè derogamus, cæterisque contrariis quibuscumque.

Datum Romæ apud S. Mariam Majorem sub Annulo Piscatoris, die 10. Sept. 1659. Pontificatus Nostri anno quarto.

Contrariis derogat.

Dat. P. An. 4. die 10. Sept.

Quod non extrahantur libri, & scripturæ ex Archiviis, & Conventibus, ac Bibliothecis Canonicorum Regularium Congregationis S. Augustini in Regno Portugaliæ existentibus.

LIII.

ALEXANDER PAPA VII.

*Ad futuram rei memoriam.*

**C**onservationi, & manutentioni librorum, & scripturarum Bibliothecarum, & Archiviorum publicorum omnium, & singulorum Conventuum Congregationis Canonice Regularium S. Augustini in Regno Portugaliæ existentium quantum cum Domino possumus benignè consulere, ac Dilectum Filium modernum Priorem Conventus Sanctæ Crucis dictæ Congregationis Colimbriensis, qui totius Congregationis prædictæ

Edita A. D. 1659.

Regni